



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 8

Sudan nungi US embassy staff tem aninba Biden-i jangjatsüogo

Novak Djokovic Madrid Masters nung masayatsü



VOL. XX NO. 191 (ADOK 191) DIMAPUR TENTONÜ (MONDAY) RONGCHII (APRIL) 24, 2023 ₹ 5.00

Nagaland ya kanga dang renloka aoba state ka lir: MoS Dr.L.Murugan



April 23, 2023 nü Union MoS Dr. L. Murugan-i Dimapur Airport nung DPRO Dimapur den sensaksemba angur.

Dimapur, April 23, 2023 (TYO): Nagaland ya terenlok aser alima den külemi ainba state ka lir ta Union Minister of State Dr. L. Murugan-i ashi.

Information & Broadcasting & A.H., Fisheries and Dairying MoS Dr. Murugan-i District Public Relations officer (DPRO) Dimapur den sensaksemba dang iba olen ashi.

Dimapur nung arua manenzükdangbo pai Nagaland ya terenlok maliba state ka asütsü ta bilema liasü. Ajisüaka pai Nagaland kübok tesem kar sema senzüdang Nagaland ya terenlok aketba aser tanü putu den apet

state ka ta tangatetba melenshi aser Nagaland nung tourism sector dak sendakba mapa teinyaktsü aika lir ta Dr Murugan-i DPRO dang ashi.

Nagaland nung piggery aser fishery sectors mapa jenti inyaka otettsü lir anungji bangdak department temi entrepreneurs ajungkettsü nükjiding yur Centre den tebilembatem lemsateptsüla ta paisa ashi.

Nagaland ya tobur tajung tesem ka lir aser sobaliba nung kanga takar lir. Hornbill Festival mapang pai Nagaland semdangi arutsü ta Dr. Murugan-isa metetdakttsü.

Amritpal Singh Dibrugarh Jail nung puoka lir

Dibrugarh, April 23, 2023 (Agencies): 'Waris Punjab De' tanishisang Amritpal Singh Deobarnü Dibrugarh Central jail-i anir aruogo.

Deobarnep Punjab Police-i Amritpal apuba sülen Bhatinda nungi tayimtsü ka ajanga pa Dibrugarh airport-i anir aru.

"Tanü nikongdang 2:20 ako meta special aircraft ka nung Amritpal anir arua Dibrugarh airport nung anenzük. Idakji teinyaktsü ajak inyakba sülen nikongdang 3.20 ako meta pa Dibrugarh Central Jail-i anir ao" ta ketdangsür kati ashi.

Deobarnep Punjab nung Rhode yimtsüung nung Amritpal Singh apu. Gurdwara Janam Asthan Sant Khalsa nung pai police ket nung pa sasa bendanga agüja liasü.

Pa ya National Security Act (NSA) kübok tai tonglokja apu.

March 18, 2023 nü Punjab nung Amritpal aser pa den yaritepertem anema mapa tenzükba sülen pa jenshia aru.

Tang tashi nung 'Waris Punjab De' züngsem 9 tashi Dibrugarh jail nung anir arua puoka lir.

Parnokji Daljeet Singh Kalsi,

Papalpreet Singh, Kulwant Singh Dhaliwal, Varinder Singh Johal, Gurmeet Singh Bukkanwala, Harjit Singh, Bhagwant Singh, Basant Singh aser Gurinderpal Singh Aujla nung lir.

Dibrugarh Central Jail ya 1859-60 nung British sorkari ajanga yangluba liasü. Iba jail ya ali bigha 47 (76,203.19 sq metres) nung yanglua lir aser Northeast nung jail tejentiba rongnung ka lir.

Iba jail internal security ya Assam elite Black Panther commandos-i repranger aser telung nung CRPF, Assam police aser prison guards-i ketdangsüa repranger.

Punjab sorkari mezüngbo Amritpal demn yaritepertem Delhi nung aliba Tihar jail-i yoktsü bilem saka Delhi tepuokdak balala nung Punjabi nung ozüng alema inyakerkem, telungpurtem puoka aliba agi Assam-i dang yoktsü lemtet ta osang angazüker.

Assam nung Dibrugarh jail ya tawa 'super maximum security prison' jenjang nung ajungketogo aser iba jagi iba jail nung puoka ayur shingia jena moutettsü ta bilemer.

Assam aser Nagaland tsüngda nangzüktepba magizüker: UNTABA

Dimapur, April 23, 2023 (TYO): April 21, 2023 nü Assam aser Nagaland Chief Minister tem tsüngda 'Disputed Area Belts' nung totzü atsüteta agitsü nangzüktepba magizüker ta UNTABA (United Naga Tribes Association on Border Areas)-i metetdakttsüogo.

Assam aser Nagaland tsüngda arrtsü mangatettep ya Assam sorkari Election Commission of India, Ministry of Home Affairs aser Nagaland sorkari anema Supreme Court nung 'Civil Suit No.2 of 1988' benoka lir.

Iba Civil Suit ya magien tashi Assam aser Nagaland ajanga mapa kecha inyaktsü makok ta UNTABA-i ashi.

January 24, 2022 nü Guwahati nung state anaprong nungi Chief Minister temi arrtsü ken o ya okadaki moi angatetteptsü ta ashi aser iba ya nisung ajaki pelaa agizük. Iba dak sendakba nung UNTABA-i Assam Border Affairs Minister Atul Bora den ajuruteper aser 'Civil Suit No.2 of 1988' agientsü atema mepishia liasü. Idangji Minister Bora-ia Assam sorkari benokba Civil Suit ya tetsükdakttsü ka lir ta nangzük.

Anungji state ana tsüngda 'Disputed Area Belts' ta ajaba tesemtem nung petroleum products dena ali rongsen agiteta agitsü ta asübaji magizüker aser

mapa küma meinyaktettsü. Naga nungeri kodanga putiotsü kulitem meyiysaba magizüktsü ta UNTABA-i ashi.

Nagaland-i Assam den ashishitepba tesemtemji Dissoi valley, Geleki aser Merapani ta ashibaji tai lir kechiyong Nagaland indang ali nung Diphu, Nowgong, Golaghat, Jorhat, Tinsukia aser Dibrugarh District kübok tesem aika densema lir, ta UNTABA-isa metetdakttsü.

Iba onük ya aiben India Prime Minister, India Home Minister, Indo-Naga Political talks Interlocutor aser Naga National Political groups den benoka lemsatepogo. India sorkari aser Naga National Political groups ajanga UNTABA dang Assam aser Nagaland arrtsü ken o atema 'Independent and Empowered Committee' ka tentettsü nangzükogo. Iba ya Home Minister Amit Shah aser taoba Nagaland Governor & Interlocutor R.N. Ravi nati nangzükka liasü.

Anungji Nagaland sorkari Assam sorkari dang tamasa parnoki Supreme Court nung benoka aliba Civil Suit agientsü atema jembitsüla aser iba sülen jiang state sorkari bilemba ama inyaka otettsü, aji ta mesüra timtem ajurutsü ta UNTABA-isa ashi.

WC, NNPGS-I TAKHANGBAAGÜTSÜR:

Külen, Working Committee (WC), Naga National Political Groups (NNPGs)-ia tanga sangdong ka nung Nagaland Chief Minister dang Assam den ashishitep aketba tesemtem atema Memorandum of Understanding (MoU) agia lira agientsü takhangba agütsüogo.

Assam aser Nagaland state sorkartem dak arrtsülen totzü atsüteta agitsü mesüra ashishitep aketba tesemtem atema jembitsü tashi mali kechiyong iba ken o ya WC, NNPGs aser India sorkari tsüngda yimtenren olemtem nung dena lir ta Media Cell, WC, NNPGs sangdong ka nung metetdakttsü.

Indo-Naga yimtenren olemtem nung iba ya tongtipang onük ka lir aser tatembang lemtet ka magi lir. Assam aser Nagaland State sorkartem ya ashishitep aketba tesemtem atema 'caretaker governments' dang lir aser tesüiba nung arrtsü atema mepetmesü adokdang tai maketba nisungtem aser police taküm samaba bilemtettsüla ta WC, NNPGs-i sangdong nung shia lir.

Tanü Nagaland aser Assam tsüngda salemtepba ajanga azütokshitepba tensa ka ano ajurutsü akok anungji state ana nungi Chief Minister tem tsüngda MoUs meypa agitsüla ta parnokisa metetdakttsüogo.

CMHIS Nagaland nung hospitals 47 züngsema lir

Dimapur, April 23, 2023 (Agencies): Nagaland nung mozü ki aika Chief Minister's Health Insurance Scheme (CMHIS) kübok züngsema lir.

Nagaland nung empanelled hospitals 47 nung CMHIS kübok teyari agitsü akok aser iba nung sorkari o nija mozü kitem dena lir.

Mozü kitem rongnung

CHISR, Faith Hospital, District Hospital Dimapur, District Hospital Longleng, District Hospital Phek, District Hospital Tuensang, District Hospital Zunheboto, Naga Hospital Authority, Bethel Hospital, Oking hospital, State Mental Institute, Dr. Imkongliba Memorial District Hospital Mokochung aser Dr. Motsuo

Memorial Hospital dena lir.

CMHIS kübok empanelled hospitals ya Kohima nung 9, Mokochung nung 6, Phek o Tuensang nung pungugu, Dimapur o Mon nung pezüzü, Peren o Kiphire nung asemsem, Chumukedima o Shamator nung anana aser Wokha, Longleng, Noklak o Zunheboto nung kaka lir.

Dimapur nung tzünglu den yipru süi; Tinsukia nung 2 asü

Dimapur, April 23, 2023 (TYO): Deobar nikongdang

Dimapur nung mopung tashi agi ona tzünglu arudang tesem aika nung teraka jenti ajuruogo.

Anogo ishika kanga dang tatsük ajurua aruba sülen tanü nikongdang ajungbena dang tsüngsang melenshia liasü. Tanü yipru ajanga süngdong aika laodakttsüba ajanga power infrastructure nung teraksa ajuru. Ajisüaka ghonda ishika lir power supply tiptema kümdakttsüogo.

Mopung tesashi aonba ajanga tesem aika nung süngdong laoba aser kiojen kar raksaba osang angazüker. Ajisüaka iba osang zülü tashi nung nisung yiruyibongba osangbo kecha mali.

Assam aser temeket state tem asoshi 'Yellow' warning

agütsür

Deobarnü Met department-i taruba anogo ana atema Assam aser temeket state tem asoshi 'yellow' warning agütsüogo.

Assam anüdoklen aser temeket nung mopung adoka lir ta Regional Meteorological Centre (RMC)-i metetdakttsü.

Iba ajanga Deobarnü Assam, Meghalaya, Nagaland, Manipur, Mizoram aser Tripura nung tsüngmok atena tzünglu arutsü aser mopung tashi agi aontsü ta RMC-isa ashi.

IMD ajanga tsüngsang-mopung atema colour codes pezü amshir- green (no action needed), yellow (watch and stay updated), orange (be prepared) aser red (take action).

North Eastern state tenetprong kübok tesem aika nung tsüngi aia tzünglu arutsü

ta RMC-isa metetdakttsüogo.

Külen, Honibar aonung Tinsukia district nung rü tsüka yipru aйдang nisung ana asü ta Deputy commissioner Swapneel Paul-i ashi.

"Onoki tanü tasür kibong ana shia nem Rs 4 lakh teyari agütsüogo" ta Paul-isa ashi.

Iba lendong nung kiojen raksaba aser tanga rongsen laluba asadanga sülen teyari agütsütsü ta paisa shisem.

"Tinsukia jila nung electricity poles & wires 60%-70% tashi raksaogo aser taonung tashi nung power supply agütsütsü atema inyakdar" ta DC Paul-i metetdakttsü.

Deobar aonung süngdong laoa lenmangtem noktanga tanep telok pungui merüktetogo aser traffic nung timtem kecha mali, ta paisa shisem.

Chuchuyimpang Baptist Arogo nung Sobaliba Reprangshiba aser Tetsü Oshi Terenlok sentong aka



Chuchuyimpang Baptist Arogo nung Sobaliba Reprangshiba aser Tetsü Oshi Terenlok sentong Rongchii(April) 22 aser 23 nü agiba Sobaliba Reprangshiba sentong agidang tangokba aser tetsü oshi terenlok sentong Padmashree T.Senka Ao-i tongti o jembidang tangokba noksa nung angur.

Mokokchung, Rongchii/ April 23(TYO) : Ao Baptist Arogo Mungdang kübok Arogotem nung Tsüklai (February) nung tetsü oshi terenlok sentong agiogo, aji saka arogo nung wadang jenti aliba ajanga magiteti arur iba sentong ya kanga dang tongtipangta angateta Chuchuyimpang Baptist Arogo nung Chuchuyimpang Baptist Arogotsüri achaayanga Sobaliba Reprangshiba aser Tetsü Oshi Terenlok sentong Rongchii(April) 22 aser 23 nü ta anogo ananü agiogo.

Mezüngnü Rongchii(April) 22 nü Sobaliba Reprangshiba sentong agidang lanurtem nem Wb.Alemtoshi aser Wt Pangienla tenati tetsür aser tebur asen Aor sübosolemba yimya talisa sobaliba sübotsü koma sübotsü itemji süboa sayuba den item sübosolemsü nungja aser teratetem rasa-a ashi, iba den ano kidang

amshiba osettsüsetem, alu nung amshiba osettsüsetem nungja aser item indang teratet rasa-a metetdakja liasü.

Tanünü Rongchii(April) 23 nü tetsü oshi terenlok sentong "Tetsü Oshi Ajanga Nüchiba Dangi" ta asüba omen nung ajemdaker aka,iba sentong nung omen dak ajemdaker Padmashree T.Senka Ao-i tongti o jembidang nüchibaji kechi ta süra talenba aser tamokbangba kecha makai temeden ka nung sadok sadoka ainba dang ajar,anungji Aori Ao oshi jembiba ajanga nüburtem tesendaktep akang alongtepa alitsü aser nüchiba dangi anitsüsa jembitsüla ta ashi.

O jembiba ya tetsü nungi tenzüker, tetsü aser tanur tsüngda o jembibaji temeim agi tenzüker aser tesendaktepi mesamar, yongji dang tetsü sayutetba oshi nung tanurji inteta tasünü tashi iba oshiji jembir, anungji tetsütem dak oshi

wazüka yutettsü tashi tulu lirta T.Senka Ao-isa adenshia aliba tetsütem ayongzüka ashi.

T.Senka Aoisa tenla ki sabangji Ao oshi sayudak tajungtiba lir,sayutsüngeritemi kanga dang shisadanger jembitsüla, tenla ki sabangi nungi aibelena jembira tekülemertemi aji angazüka jembiba ajanga Ao oshi tashi meiti akumba tera ka asütsüta tekümdangtsü olen ka metetdaksü.

Aori meyipzüka jembiba, meyipzüka züluba aser meyipzüka atenba nung aiben dang aibelener aser ibaji ajanga teraksa tulu adoker aser nüburtem mashileni anir, itemji tenük agi angudang kanga dang temelung shiranger,aji asünung meyipzüka jembidang, meyipzüka züludang aser meyipzüka atenba nung kang dang kümdangtsüla ta tongti o jembir Padmashree T.Senka Aoisa adenshia aliba nüburtem ajungmesoa jembir.

NU Meriema nung süngtong tema Earth Day mungogo



Kohima, Rongchii/April 23 (TYO): "Invest in our Planet" omen nung ajemdaker Earth Day amungba mapang Department of Geology, Nagaland University aser Social Forestry Division, Department of Forest, Environment & Climate Change Nagaland longjemer Honibarnü Nagaland University Kohima Campus nung süngtong atemba sentong ka ayongzüka agiogo.

Sentong nung o jembiba mapang Deputy Conservator of Forest, Enyiwekha Wezah-i, alima temerekba aser tsü mopung tajungba kümdakja talitsü tajungba küma yanglushitsü atema iba sentong ya ajak ajangzüksü asoshi ayongzükgogo, ta ashi. Alima ka dang lir anungji asenoki tzü mopung den liromedema alitsü nungdaker, ta paisa shisem.

"Asenoki taküm nung tajungtiba dang aginer, saka alima ya lendong balala nungi jenboa metoktsüra asenok mapa ajak amajok akümtsü," ta pai ashiba den tzü mopung

melenshiba, alima tatsükba akümba, rürjep yangsa aoba amala tebilemsütem ya tangsa tang bentettsü nungdaker, ta ashi.

"Asenoki asenok shilem magir sür nung alima raksaba atema industrialists mesüra world economists tem dak dang tai tonglokja melitettsü," ta pai ashi.

Iba dak sendakba nung pai, tissue paper melena handkerchief amshiba, tanaben amshitetba marok aser auso amshiba aser khen dang amshiba osettem mamshitsü asoshi ajungshiba, nungdak makaba mapang nung light sepa ayuba, fossil fuel kümzüksü atema senzusenpongtsü asoshi transport lemsatepba, tzü tap shibanga ayuba, energy kümzüksü atema computer shibanga ayuba, shishilembadang yangko/juli amshiba aser item ajak dak alia süngtong timba atemba amala yimyayimpong nung temelenshi kar bener arutsü atema ajungshia liasü.

"Asenoki ibala yimya mebenshi lira tanü nungi tenzüka benshiti," ta Wezah-i ashi.

Sentong nungsa NU Meriema Campus Pro-Vice Chancellor, Prof Glen Thong-i sentepa aliba lokti ajungshi aser kaketshirtem dang parnokti atemba süngtongtem anepalutsü ajungshia liasü. Pai university campus kübok medical unit nung mezüngbuba süngtong temja liasü.

Ranger Kohima Division Keneikrul Noswe-i süngtong atemba yimya sayua liasü. Iba sentong ya Assistant Professor Dr Tlemsulemba Walling lenisüba nung agi, Assistant Professor, English Department Dr Lemtila Alinger-i tsüngrem temaotsü meshizüka sarasadem aser Geology Department tekolakba Prof B. V. Rao-i tepela o jembia liasü.

Teaching aser non-teaching faculty den kaketshirtem aser NU Kohima campus hosteller temi iba sentong nung shilem agia liasü.

Tsiepfütsiepfhe Council-i kiyong telungzük repranga jaja

Kohima, Rongchii/April 23 (TYO): Tsiepfütsiepfhe Council AG Colony Kohima den GBs, Sector Union ketdangpur aser lanur temi April 19 nungi April 23, 2023 tashi verification drive ka colony telungzük nung agia liasü.

Iba mapang nija temi lenmang aser tetsüng lenmang agiba, traffic aser gari anenba, mürekmejuba, talisa jana indokba, kilentzü lenmang meshidak aliba, water distribution system meshidaki aliba aser pipeline tem tapi agi sendaktepba, Welcome gate meshidaki inokba, electricity aser Reliance Jio Infocom Ltd posts azünga aliba aser inyakyim balala asadanga liasü.

Gari aser tetsüng lenmang tem ozüng alema agia aliba agientsü, tekeraba nung gari aser

tetsüng lenmang, kilentzü aoba lenmangtem, tzü bendena ayuba tesem, water distribution points talila yanglushitsü nungdakba nguteta liasü.

Parnokisa welcome gate, electricity aser Reliance Jio Infocom Ltd post tem tesem melenshia inoktsü nungdakba ajiteta liasü.

Iba dak sendakba nung council ajanga ali kibur, department balala, lokti tentet aser kija-kibong tem dang colony nung arok ajungtsü mechi yariteptsü ayongzüka liasü.

Council ajanga verification tanabuba May aser June ita agitsü ta metetdaksü.

Lenmang ulushitsü aser nüburtem nungdakba maparen inyaktsü atema ali tenla agütsür dang pelar, ta Tsiepfütsiepfhe Council ajangasa ashi.



Rongchii 23, 2023 anogo Rev. Pastor O.Yashi Jamiri züluba "Kangki Taochi" kaket Süngkomen Baptist Arogo nung ASLB Tezulur, Wabong Temjen Tzudiri sayatsüdang agiba noksa ka yangi angur.

AR- temi Peren district nung Earth Day mungogo

Dimapur, Rongchii/April 23 (TYO): HQ IGAR (North) kübok Assam Rifles temi Peren district kübok ssam Rifles Public High School, Jalukie nung April 22, 2023 nü 53 buba World Earth Day munga sobaliba sentong aser toketepba sentong balala agia liasü.

World Earth Day amungdang school tanur temi skit, lokti tsüngsang aser ken agi shilem agia liasü, kong Principal, Dr Neha Gupta, tesayurtem aser tongti tesemdanger Dr Prabhat Kumar, IFS, District Forest Officer, Peren nungertem dena liasü.

Lipajen wazüka ayutsü aser nungdonglidong atemtsü aser alima tatsükba akumba aser menenba ajanga alima nung kongshia timtem agütsüba nung rangloker iba sentong ya ayongzüka liasü.

Iba sentong nung tanurtemi omen nung ajemdaker o jembir aser sangro zünga liasü. Sentong nung tongti tesemdangeri omen nung ajemdaker shisa lemsatep aser tanurtem dang pei akokba yari temelenshi bener arutsü mapa tem inyaktsü ajungmesoa liasü.

Kasa mapang Inter House Face Painting & Drawing Competition ayongzüka tanurtemi pei sempet amshia alima kumzüka ayutsü indang

lemsatepa liasü. Iba sentong nung tesayur 14 aser kaketshir 110-i shilem agia liasü.

Maneni Assam Rifles temi World Earth Day nungtem nung April 22, 2023 nü Peren district kübok tesem tezülen süngdong atemba aser awareness sentongtem ayongzüka liasü.

'Invest in Our Planet' omen nung ajemdaker Assam Rifles temi Athibung, Bamsikilwa, Impai, Ngalwa aser Old Poilwa ama tezülen aliba yimtsüngtem nung oa yangji alirtem den yaritepa süngdong tema liasü.

School tanurtem aser nüburtem den lipajen wazüka ayutsü aser plastic ajanga lipajen menentsüba indang awareness lecture agüja liasü.

Parnoki nüburtem dang süngdong atemba sentongtem ajanga ali anenzüka aoba mesüra timtem balala nungi kumzüka, alit emu itdaksüba, ali telung nung tzü atsüngdenba, akhi yimya nung süngdonglidong aser takumsangnu kumzüka ayuba indang nüburtem nem angazükdaksü.

Maneni lipajen wazüka ayuba ajanga rongsenketzung nung tajangzük aliba indanga parnokti lemsatepa liasü.

Item sentong nung yimdaklir nisung 99 arua shilem agia liasü.

Taruba anogo 5 tsüngda linük tesem aika nung tzunglu arutsü: IMD

New Delhi, April 23 (Agencies):

India Meteorological Department (IMD)-i taruba anogo pongu tashi linük tesem aika nung tzunglu arutsü, ta metetdaksü aser Met department-ia taruba anogo pongunü tali atsükba süngjemtsü, ta asadangtetba metetdaksüogo.

IMD-i sangdong ka ajanga, Central India nung tzunglu den yipru aittsü, tsüngi aitsü aser taruba anogo pezü tsüngda East Madhya Pradesh, Vidarbha aser Chhattisgarh nung tzunglu aruba den mopung aontsü, ta metetdaksü.

Met department-ia April 24 nü Vidarbha region tesem aika

nung rür tsükba den tzunglu arutsü, ta metetdaksü.

IMD-i, taruba anogo pongu nung Andhra Pradesh, Telangana, Interior Karnataka, Puducherry & Karaikal aser Mahe nung tzunglu aruba den mopung aontsü aser tsüngi aitsü, ta metetdaksü.

IMD-i, April 24 nungi April 26 tashi nung Madhya Maharashtra aser Marathwada nung tzunglu aruba den tsüngi aitsü, ta tekümdangtsü metetdaksü.

Taruba anogo ana tsüngda Central India nung maximum temperatures 2-3°C atutsü, ajisüaka iba dakji talibo matutsü, ta IMD-i metetdaksü.



April 23, 2023 nü Bhubaneswar nung Odisha Chief Minister, Naveen Patnaik-i Millet Shakti Café semzüksüdü tangokba noksa nung angur.

Karnataka Assembly elections nung CPI-i Congress Party yaritsü

Bengaluru, April 23 (Agencies):

Taruba Karnataka assembly election nung Communist Party of India (CPI)-i constituency 214 nung Congress party yaritsü telemtetba agiogo, ta Amongnü CPI-i sangdong ka ajanga metetdaksü.

CPI-i menden tenet nung party candidates toktepdaksütsü, ajisüaka tanüngba menden ajak nung Congress candidates yaritsü, aser iba ya democracy aser linük temzüngtem kümzüksü atema lir, ta sangdong nung shia lir.

"BJP state sorkar ya ochimashi ta kuli nguogo aser jenjang atuba, mapa manguba, shisaliok aser health facilities majungba ama chichiba tebilemstü onüktem atema inyaksü melen yimsü nung ajemdaker tesempa ang proker. Anungji taruba assembly elections nung BJP tamakok ngudaksütsüji onok teinyaksü mapa lir. Iba dak alia party shingai sorkar mekümtetsüsa (hung assembly) tensa majurutsü atema onoki inyaksü, kechiyong iba ama tensa ka nungji IT aser ED departments ajanga sen aser tashiyim amshitsü aser MLA tem alizüksü atema BJP-i inyaksü. Democratic aser linük temzüngtem kümzüka ayutsü atema CPI-i iba telemtetbaji agiogo," ta kasa sangdong ajanga metetdaksü.

CPI-i Mudigere, Aland, Jewargi, Kudlagi, KGF, Sim aser Madikeri nung ang party candidates toktepdaksütsü.

"Melukote nung CPI-i Sarvodaya Karnataka Party candidate yaritsü aser Bagepalli nung CPI(M) candidate yaritsü. Tanüngba assembly constituency 215 nungjibo CPI-i Congress yaritsü," ta parnokisa metetdaksü.

Congress-ibo Assembly menden ajak (224) nung tokteptsü.

Ano tanga osang ka nung, Amongnü Karnataka kübok Vijayapura nung Congress lenir, Rahul Gandhi-i Road Show ayongzüka agiogo.

Pai Chhatrapati Shivaji Maharaj kürakyanglu semdanga naro tokja aküm agütsüba sülen road show tenzüka liasü.

Rahul den Karnataka Congress campaign committee tongti, MB densema party nung lenirtem aser party nung inyakerem aika liasü.

Rahul Gandhi-i election nüboyim atema ananu Karnataka semdangar. Amongnü anepdang pai Kudala Sangama semdanga Aso 12buba nung sangro mejemer aser loktiliba nung temelenshi adokdaksür, Basaveshwara nem akhüm agüja liasü.

Karnataka nung Assembly election May 10 nü agitsü aser May 13 nü vote azüngtsü.

Punjab police-i Moga district nung Amritpal Singh puogo



April 23, 2023 anepdang Moga District nung Punjab Police-i Amritpal Singh apuba sülen tangokba noksa nung angur.

New Delhi, Rongchii/April 23 (Agencies):

Alia oa sayutsüngir, Amritpal Singh anogo 35 tashi jenshia senzüba sülen tesüsa police-i Punjab kübok Moga district nung puogo.

'Waris Punjab De' lenir, Amritpal ya Amongnü anepdang 6:45 ako meta Rode yimdak apuba sülen tayimtsü ajanga Bathinda nungi Dibrugarh (Assam)-i anir ao.

Nikongdang 2:20 ako meta Dibrugarh airport atongba sülen sülen pa Dibrugarh Central Jail nung puokogo. Police-i pa bushiba mapang pa den külemi inyaker aika puogo aser parnoka kasa jail nungsa puoka lir.

Pa den külemi inyaksemer nisung 9-a Dibrugarh Central Jail nung puoka lir. March 19 anogo nungi tenzüka jail aser temeket nung security sepai aika tokja lir. Iba anogo nungji 'Waris Punjab De' nung

züngsem pezü puoka liasü.

Punjab IGP, Sukhchain Singh Gill-i, "Onoki pa puogo. Tesem ajaklen nungi pa longbangba ajanga pa jena moutet," ta metetdaksü.

Amritpal apuba sülen AAP lenir aser Punjab Chief Minister, Bhagwant Mann-i video sangdong ka ajanga, "Yimjung aser tesünep raksatsürtem ozüng kübok merenshitsü. Onoki tai maket shinga nem timtem magütsütsü. Onoki yimtenren tsütsü nungi mangyangba mapa meinyaker. Anogo 35 tsüngda tesünep aser yimjung meraksatsüba atema ni Punjab nunger crore 3.5 dang pelar," ta metetdaksü.

Delhi Aam Aadmi Party (AAP) lenir aser Minister Atishi-ia, Amritpal putetba ya Punjab Police aser chief minister leniba nung state sorkari ita ka dak tali anibeleva inyakba ajanga lir, ta tenüngsang agütsü.

Ano külen Congress party-ibo, Amritpal ya Centre sorkar asü Punjab sorkar den tesendaktep liasü, ta ashi.

Amongnü Congress lenir, Randeep Surjewala-i, "Khalistan pusemsang ya Centre mesüra Punjab sorkar nung kar den tesendaktep liasü asü?" ta asüngdang.

"India anema jembir aser kiralongrartem pusemer, Amritpal Singh ajentsüsa shibai mezüng nuugi yari? Amritpal kong atsüka liasü? Shibai pa jenokdaksü? Pa kong among? Parnok ajakji India anemertem masü no? Pa den inyaksemerji shiba liasü? Punjab police, CBI aser IB-i kechiba item osangji jungkai madoktsür?" ta Surjewala-i asüngdang.

Amritpal apuba sülen Union minister, Anurag Thakur-i, ozüng nung tashi tulu lir, aser kiralongra prokerem nem temerenshi tulu agütsütsüla, ta ashi.

India nung ano nisung 10,112 dak Covid putet aser 29 asü

New Delhi, April 23 (Agencies):

Tesüiba anogo ka tsüngda India nung ano nisung 10,112 dak coronavirus putet aser ibaji densemabo tang linük nung coronavirus agi teshirangdakpur 67,806 kümogo, ta Amongnü Union health ministry-i metetdaksü.

Kasa mapang nungji coronavirus agi shiranger

nisung 29 asü, aser ibaji densemabo linük nung iba tashidak agi asür ajak senteper 5,31,329 jungogo.

Tang linük nung anogo shia coronavirus positive putetba shilem 7.03 kümogo aser hopta shia positive putetba shilemji 5.43 lir.

Tang iba tashidak agi teshirangdakpurtem 67,806 ji

coronavirus caseload nungi shilem 0.15 lir; linük nung iba tashidak agi shiranger anepba shilem 98.66 lir aser iba tashidak agi asür shilem 1.18 lir, ta health ministry website ajanga metetdaksü.

Tang tashi nung coronavirus vaccine dose crore 220.66 agütsüogo, ta parnokisa metetdaksü.



Kudalasangama (Karnataka), April 23, 2023: Amongnü Kudalasangama nung tawa Congress nung adensang, Jagadish Shettar aser Congress lenir, Rahul Gandhi na senden amendang tangokba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, RONGCHII (APRIL) 24, 2023

Shi ango akatsüsa inyakdi

Asenok su nung shi aser ango medenra chi mechiyongteter, anungji asenoki jangraba aser taginüba tulu kaji chiyong shia shi mesüra ango den chiyongner. Tetezü, pasa chiyongtsübo asenok aikati tebang yarer. Ibai asenoki anogo shia ajuruba tepelatsü mesüra tebilemtsü ka lir. Tetezü, kidang teti shi ango akar atema tepelatsü saka makar atemabo tebilemtsü. Ajisüaka, anogo shia shi ango den dang chiyonga pelaa alirtem asoshia tebilemdangtsü kaji, asenoki shi ango aliba senji shiba nem agütsür aser aji kongi aoer? Tanabuba nung, asenoki achiba shi aser angotem jagi asenok temang nung timtem magütsütsüsa chiyongtsü shitak agüja metsübatem asü masü? Itemji kodang asenoki jungjunga bilemdangdir, ashiko karibo tangaleni bener aruba shi ya techinüa mechinütsü? Aser achiyonga akok tashi ajema achitsü merangtsüa akok. Atangji, shi rongnung asenoki kanga sapua achibaji ak shi ya lir, ajisüaka asenoki asen peria achitsüsa ak memetsütetter, anungji khen khen benjongbentsü nung pei kidang metsüba ak tepsetba dak alaka asenoki anogo shia shishilemba dak nungi alia achiba ak shi yabo tanga state-tem nungi bener aruba lir. Kasaji, ango-a asenoki asen peria memetsüteter, anungji tangalen nungi bener aruba tüzüm ngo tamajung makümtsü atema mozü nung ayuba teimba achir. Item akshi aser ango den asenok anogo shia chiyongba ya kodang bilemdangdir, temang asoshi chiyongtsüji ajung –majung ta asübaji khen yutsür, kechiyong asenoki asenoksasa mazüokteter dang ashi chiyongtsü indangjibo asenoki meteta lir, asenoki kanga süoki ia bilemdangtsüba kaji asenok ita sen teimbaka shi ango nung oadoker. Aji oda, Nagaland state government taküm aliba ya Delhi nungi yokba sen agi taküm alir aser Delhi nungi yokba sen teimbaka ita sen agütsüba nung endoker aser asenoki anguba ita sen teimbaka tangar bendanger shi aser ango ayokertem nem agütsür. Asenok kibong, taküm aser rongsen jenjangji yangji angatetter. Iba tensa tia yagi asenok dang asenok peribosa shi aser ango metsütettsüla ta ajungshir. Atangji, paper aser file nungbo Nagaland nung asenok perir külena tangaleni yoktetsüsa ak aser ango metsütetba osang alitsü südi. Iba ama osangji tawa Kohima nung G20 senden ama nung deparment balalai agütsüba angashir. Ajisüaka, taoba ita nungi Assam government-i Assam ajanga tanga state nungi Nagaland-i ak bener meyokba agi Nagaland nung ak shi jenjang tuadoktsü ana nung lir aser oda odabo tangua mangutsü. Shitakba agibo Assam government-i menokdangdangyongi asenoki tanga state nungi ak bener marudaktsüi nokdangtsüla, kechiyong iba jagi asen sen tangaleni oadoker aser tashidaka menar. Atangji, asenok "okora' asüba agi, tiyazü nung sen agizüka chir mapa shitak meinyaker dang ashi, Nagaland nung ak aser ango metsütsü asoshi center government nungi sen agizüka agiba yaribo tang ya asenok tangalen nungi akshi aser ango bener arua achidang masü. Iba yongji, yakanü Union minister Dr.L.Murugan-ia Pradhan Mantri Matsya Sampada Yojana (PMMSY) aser National Livestock Mission (NLM) sentongtem ajanga state nem teyari agütsüba aser ano agia inyaktsüba indang tajungshi o tajung aika lemsatepba angashiogo. Atangji, shi angoji ak aser ango dang masü saka anshi antsü, nashi aser nabong ajak dena lir. Iba denji ano shiruru metsürtem den yariteptsü asoshi Nagaland nunga Mobile Veterinary unit 16 tashi agüja lir. Atangji, asenok ajak asoshi tatishitsü tajung kaji, Nagaland nung ajak meshitak aser majung tabo masü saka asenok ajak tejak tentettsü kaji, Phek district nung Chakhesang nungertemibo tangalen nungi par district-i ak bener marudaktsür aser ango-a junga metsür aser tanga lutema junga ayimer. Joko, asenoka mapa meinyak ser tiyazü sen agizüka chia tiyazü lima nung tiyazü agi takar küma aliba mapang aser alitsü bilemba anogotem to süitemogo. Item tiyazü mapa aser anogotem to agi asenok kanga ashiocksüogo ta rajema, mapa shitak inyaka asangsang nung shitak ali tenzüksüba anogoji tanü lir. Asenoki shitak inyakra asenok sen tangar keti maotsü aser asen alu nung aser kidang tangar teyaria menüngdaksü. Iba tangatetba nung tanü asenoki asen lima yanglushi tenzükdi.

OLEMSABANG

AJEMALUR-I ALIMA SENMANG AMANGTSÜ

~ L. Kika Pongener.

Asen oshi nung 'ajemalu'...'ajema-alu' tetezü...Tulur saka tilar amai akümba, takar saka sensaker amai akümba, tashi-temetemeteter saka mashi-memeteter amai akümba...Yamala nisung dangji 'ajemalur' ta ajatsü akok. Alima nung mimchir ajaki meinyaktetba mapa tasaktibaji tila akümtsüba ya asütsü. Atangji, nisung shiangaia tila mekümnur aser mekümteter. Ajisuaka, kodang Tsüngrem o nungji züngdangdir, "Shir ajemalurtem lir parnok temoatsüba; kechiaser parnoki alima senmang amangtsü aser yimjung nung azükarotsü" (T.Ken-37:11). "Kibuba madang nenok sasa ajemalua kümang, aser pai nenok ulutsütsü" (Yakob-4:10). Yisu alima nung alidang, pa nütsüngtem rongnunga mapang shia 'Shiba tulutiba' (?)...ta toktepa liasü. "Shiba tulutiba ta parnok rongnung toktepa jembitep" (Luke-9:46). Ano Yakob o Yohan nati-a Yisu dang ne yimli kodang arudir tena ka tajichilen aser ka tabelen amentsü atema asüngdang (Mathi-20:20-21 & Mark-10:37). Ano kenu nütsüngtemi Yisu dang asüngdang..."Kodak yimli nung shiba tulutiba"...??? (Mathi-18:1). Aji oda, nütsüngtemi Yisu dang onok rongnung shiba tulutiba ta asüngdangtsübo numamedangteti bilem asütsü, anungji parnoki kotak yimli agi ademer asüngdang sudi. Ajisuaka, Yisui parnok mulung nung bilembaji ngur parnok dang lesson tajung ka sayu. Yisu-i tila tanür ka jar parnok rongnung yutsü aser ashi, "Ni nenok dang züngpong ashir, nenoki iba tila tanür ama mekümba, kotak yimli-i kodakang maitsü". Yisui parnok dang sayuba nungji nütsüngtem kanga sungmangogo sudi, kechiyong ashiko parnokibo parnok rongnung kar tenungteta...Peter tuluba-a ta...Yohan tuluba-a ta...mesura Yakob tuluba-a ta...ashitsü yimla-a liogo sudi. Yisu nütsüngtem amaji pei sasa ni tuluba-a ta ulua bilemba nisung aika lir. Ano tanga mapang ka nung Yisui ashi, "Shibaisa pei sasa uludir pa tila akümtsü aser shibaisa pei sasa tila kümdir pa ulutsü" (Mathi-23:12).


Ano tanabuba nung alima senmang ya kechi...??? Kimong-lumong, ki-o-jen, sen, tsük, sempet tajung aketba, kenshi-oshi, o tsüngro songa jembitetba, shisatsü tarok metetba, yimten, arogo aser loktiliba ajak nung atongoka shilem tajung agitetba, iba amala tang ya alima senmang ta ashitsü akok. Alima nung alidang nisunger taküm alitsü asoshi kimung-lumong, ki-o-jen, sen, tsük yamala rongsentem aika nungdaker. Aser shirnok ket nung item rongsentem aka parnok dangji taka-taiter ta ajar. Ano tanabuba nung, nisunger libaliro nung kenshir-oshir, shisatsü tarok metetba, o tsüngro songa jembitetba, lokti lennitsü wainshin sempettem ya kanga tongtipang lir. Aser item ama sempet aketer nisung dangji tashitemeteter ta ajar. Aji oda, alima nung yimden, arogo aser loktiliba ajunga tashi-ita alitsü atema taka-taiter aser shisa akar/kenshi-oshir ajakji nungdaker. Koba linuk, yimtsüng aser telok nung taka-taiter aser shisa-kar/kenshi-oshir/tashitemeteter aika ladir iba linuk, yimtsüng aser telokji tashi-ita tejakleni aotsü aser lenmang aisu nung takok angutsü.

Ajisuaka, item rongsen aser sempet tajungtemji tamshi shia mamshira, iba senmangji chirnur aser semchi-semnuri senmang mamangtetsüsa sama-a oa-adoktsü. Putu kar nung Tsüngremi kin/kidong kar kanga alakteta ajungketer, ashiko, par tetsü-tebou nunger putu ishika tangar küpok ala-ashia alidang, parnokki Tsüngrem tsüba ajemalua aliba senmang amanger asütsü. Ajisuaka, iba ama merena sentsüwangshia aliba mapang nungji, kanga ajemalua tila kümer ajak den asü-anguma alitsü melena, tangar tenuk agi mongui ngasangadema/mezümeküma, tain mazü inra, item senmangji chirnur/semchi-semnuri mamangtetsüsa mapang kati meneptsü. Taka-tait rongsen senmang ajungaji anak-aoyi küma aotsü aser aseni kanga mesenmetoa mezüngmeshiba kin/kidong kar keti dang item temoatsüji aotsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Archaeology ajanga Laishiba otsütem kuli agütsür: Mahoney



April 23, 2023: Film yanglur kati Israel aser Middle East nung archaeology kulitem bushisingdanga senzüba sülen pai, archaeology ajanga Laishiba nung aliba otsütem indang kuli agütsür, aser ibaji ajanga pa tamang jenjang tashi itshio, ta metetdaksü.

2015 küm film yanglur, Timothy Mahoney-i pa indang mezüing film "Patterns of Evidence" documentary sayaa liasü aser taruba ita May nunga 'Patterns of Evidence: Journey to Mt. Sinai, Part II' sayatsü tebilemba lir.

Film tasenba ya May 15 aser May 17 nung theatres nung sayatsü; iba film otsü nung Mosa-i Ozüing 10 agizükba tenem bushisingdangtsü atema benokba aika lir.

Ajaki Laishiba nung shia aliba tesentem aser Israel nung indang otsütem archaeology ajanga kuli

bushiogo. Mahoney-i film yanglutsü atema Israel densema Middle East semdanga liasü.

"Asen chirnurtemi college-i aoba mapang tashi nungbo item otsü ya tiyazü ta ashir," ta pai ashi.

Ajisüaka Mahoney-i, archaeology tebushitetbatem ajanga Laishiba nung keta aliba otsütemji shidak, ta kuli agütsür, ta metetdaksü.

"Onoki Anitet kaket nung aliba otsütem kuli ajak bushiogo-Israel nung Egypt-i aoba, Yosef otsü, tashidak balala poktetdaksüba; item otsü ajak ya shidak ta metetba ajanga kü tamang jenjang tashi itshio. Item ama film ajanga nü tamang tashi itshidaktsütsü, ta ni bilemer," ta paisa metetdaksü.

Mahoney ya Thinking Man Films tentetsang lir; Mahoney-i Arogo atema mangdang yua lir, aser iba nüngtem nung pai

Thinking Man Film nungja agütsü. Pai Arogotem dang kanga aroka shisadangdaksüner aser pei tamang jenjang indang shisadangdaksüner.

2015 küm pa indang mezüing film 'Patterns of Evidence: Exodus' nung Israel nung Egypt nungi anitetba indang shisadanga lir. Tanabuba film 'Patterns of Evidence: The Moses Controversy' ajanga Laishiba nung mezüingbuba kaket pongu nung Mosa indang kuli bushir.

Iba sülen 'Patterns of Evidence: The Red Sea Miracle (I and II)' nung Israel nung lisen lima nung nemzüba aser temeren tzüiyim adenba indang otsü lir.

Yaküm pai 'Journey to Mt. Sinai, Part II' sayaa liasü, iba pa tamang jenjang nung timtem ajangshiba 'The Journey Home' film sayaa liasü.

Khristan charity teloktemi Sudan atema sarasademtsü mepishir

April 23, 2023: Khristan charity telok balalai, tang Sudan linük nung rara ajanga nisung aika linük balalai jenshia refugees akümtsüa akok, ta metetdakja iba linük nung rara anentsü atema sarasademjang, ta mepishiogo.

Christian Aid teloki, Sudan nung rara ajanga nisung aika timtemtsü aser refugee tebilemetsü onük tuluba dang akümtsü, ta metetdaksü.

Sudan linük yimtiba, Khartoum nung raraba tensa ano tamajungba dang akümba sülen

UK, US, France, China aser India linüktemi military tayimtsü ajanga pei sensotem iba linük nungjagi aniteta anir arutsü sentong yangludat.

United Nations-i ashiba agi, taoba hopta tashi nung Sudan nung nisung 400 dak tema süogo aser nisung 3,500 dak tema yiruogo. Linük nung Sudan Army aser Rapid Support Forces (RSF) na mapang talangka mangatetep adoka aruba sülen hopta ka tejaklen rara tenzuka liasü.

Talisa linük yimtiba, Khartoum nung alirtembo aika pei kidang nungi mayazükteter, chiyungtsü aser tzi agi anünger. Africa nung Khristan

melungtet telok ACN nung Project Co-ordinator, Kinga von Schierstaedt-i, Merowe, El Obeid aser Darfur region nunga rara tenzükogo, ta metetdaksü.

El Obeid nung rara dak sendakba nung lai, "Rara sashia tenzükogo. Yimti tiyong nung aliba Tenla ki kimaji tongbang raraba tiyongtsü kümogo, kechiyong Tenla ki anasaji Rapid Support Forces (RSF) indang camp ka lir. Brihostibarnüa Tenla ki anasa bomb tesashi ana apokba ajanga Tenla ki kichiba aina raksatsüba den külema putir ki ka raksatsü. Tia kaa putir meyiru, kechiyong iba mapang nungji pa kidang maliasü," ta metetdaksü.

"Sudan nung Catholic Arogo ya kanga tila, kechiyong linük nung nütüing shilem 95 bo Muslim nung lir. Iba rara ya tangatetba mesüra yimsü dak sendakba rara ka masü, ajisüaka iba rara ajanga senso ajak kasa kongshir. Amongnü tekülem sentong agiba anenogo aser putirtema tekülem sentong magiteter," ta laisa metetdaksü.

Christian Aid South Sudan Country Director, James Wani-i, "South Sudan nung chiyungtsü agi anüing tenzükogo. Tenla aruba agi meperir. Sudan nung rara ya kera manenra refugees

aika arrtsü adena aotsü, aser timtem tuluba dang akümtsü," ta metetdaksü.

Kinga von Schierstaedt-i, "Khristantemi iba tensa atema sarasademtsüsüla. Sudan nung nüburtimi shimba sorkar amenoktsü atema sarasademtsür," ta metetdaksü.

ANOGO ABEN TSÜNGREM DEN

Khristan ain adokba

Ain adokba temenen tebeshi. Ne ain adokba manung anü teludaktsü. - Efesa 4:26.

Ain adokbai Khristan taküm raksatsüba ama tanga mapai meraksatsür. Ain adokbai pei sasa azüokba samatsür aser asenoki tanga mapang nung meinyakba mapa inyaktsü ajungshir. Maneni ain adokba lira, ibaji taku akümer aser asenok mulungjang nung tajung bilemba ajak chimar. Laishiba nung tamangertem dang maneni ain adokba indoktsü aser shi jangraba temenentem rong nung ka ama züingshitsü sayur (Efesa 4:31).

Efesa 4:2 nung shia aliba o amshia asenoki asenok ain adokba metentsütsü aiben meranger! Yisui ain adokba tenla ki meshitettsüba "temeshi ain adokba" ta kuli agütsür. Efesa nung temenen menaba ain adokba indang ashir. Yisui temenen memenai ain adoktsü koka liasü. Kodang Yisui tenla ki meshitettsü, Yisu ain adoka liasü ta Laishibai mashir (Mathi 21:12-14; Mark 11:15-18; Luke 19:45-46).

Laishiba agi asenok ain adokba metentsütsü merangba asenoki kümdangtsüla. Efesa 4:31 nung ain adokba ajak indoktsü asenok nem ozüing agütsü. Iba tetezü ochiba asoshi asenok tangatetba mesüra tejangraba ajak makatsüla ta masü. Iba tetezü koba agi asenok temenen menadaksür item temenentem indoktsü ashir. Ain adokba agi Tsüngrem telangzükba mapa bener marur; iba yagi Tsüngrem mapa tsükdanger.

Mapa kar nung na temeshi ain adoker ta nai bilemra, ne mulungjang nung temenen memenai ain adoker asü masü shisadangang. Ne ain adokba jagi na khristan kati mejembitsü o jembir asü masü mesüra tangar anema miim o jembia senzür asü? Ne ain adokba jagi nai Tsüngrem memeteti aliba yimya atemzüktsü adokdaksür asü? Ne ain adok jagi kar dang Khrista mesük temeim mapa inyaktsü noktanger asü? Ne ain adokbaji nai shisadangtsüla aser iba nung temenen kar danga lira indoktsütsü Tsüngrem dang asüingdangang.



April 22, 2023 nü London nung Khristan climate campaign telok balalai climate change tebilemetsü onük anema Westminster nung Parliament kimai longkak aita aodang tangokba noksa nung angur. London nung aliba St John's Church Waterloo nunga Arogo lenirtemi 'No Faith In Fossil Fuels Service' sentong agia liasü. 'Big One Protest' mezüingbuba anogo nung nisung 30,000 shi adenshi. Iba sentong ya Tearfund, Christian Aid, CAFOD, The Salvation Army aser Christian Climate Action teloktemi pusemer. Taoba mapang Christian Aid chairman, John Sentamu-i, teti agia Arogoi tim temeden atema ola adoker, anungji Khristantemi sorkar dang telemtetba tajung agiang ta akhangtsüla, ta metetdaksü.

AO OSHI ANGAZÜKDAK:
TANÜ ANGAZÜKTSÜBA OJANG



Poscü

(n) tepo nung nüloka aliba jana (dental plaque)

* Tepo nung **poscü** melidaktsüi meyudoktsüla.

Posü

(n) ajemalu ozü (dove)

* **Posü** ya tanela temeshi tamaitüsü ama amshir.

OLONG PAITEP # 6494

1			2		3		4		5
6		7							
					8				
9				10					
							11		
			12						13
	14							15	
					16				
			17						
								18	
19									

TIPILEN

- 2. Teburtemi tejak nung awaba
- 6. T _ _ _ em
- 8. Tzük ayudak
- 9. Nüngdakba dang timba
- 11. Züina ao
- 12. Yangi tzü angur
- 14. Tangar dang nungi tali
- 16. Senyong masü
- 17. Oadokdi
- 18. Tzü tarok
- 19. Yimtaklir aikati iba ya ki den külemi yanglusemer

LANGTSÜNGLEN

- 1. Temejangdak
- 3. Nisung ka mapa inyaktüsü nübo
- 4. Azüntsü asoshi mejemba
- 5. Tesangwa agütsüba
- 7. Tila masü
- 10. Tebenjem tetsür chanu
- 11. Tekolak nung inok
- 12. Tetsüngda
- 13. Tangar inyakba ka inyak
- 14. Tim masü ta ashi
- 15. Asalendong
- 16. Tanü dangtsü

OLONG PAITEP # 6493 TELANGZÜBA

TIPILEN :

- 1. Telok, 4. Aluru, 6. Ozüng,
- 8. Emk, 9. Kin, 10. Teti,
- 12. Süir, 13. Jen, 14. Ola,
- 16. Talak, 17. Mazük.

LANGTSÜNGLEN :

- 1. Tenükjang, 2. Luden,
- 3. Kiochtsü, 5. Lenti,
- 7. Tajangzük, 11. Teronem,
- 12. Sempa, 13. Jahaz.



ALOKBA O TEBU NA PRACTICAL INYAKER :

Tebui Alokba jar "yi agi koda tepseter", ibaji sayutsü atema glass ana bener arur, ka nung tzü aser ka nung yi züoker mesen ana bener aruagi glass ana nungji kaka inok. Tatsüka lir tzü glass nung aliba mesenji taküm ali saka yi glass nung inokba mesenjibo kitener süadok.

Tebu : Talak, iba yagi naia kechi angazüker?

Alokba : Oba ni jemra kümang nung aliba mesen ajunga südaktsür janratema alitsü sayur ati.

Tebu : Oh Aloksangba!

Lilir : WhatsApp

Tanur asoba anogo nung salem osang den noksa angati adokdaktsünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

RSS-i Shillong nung Path Sanchalan sentong agi



Shillong, April 23, 2023

(Agencies): Rashtriya Swayamsevak Sangh (RSS)-i Deobarnü Meghalaya yimtiba Shillong nung sentong ka ayonga agiogo.

East Khasi Hills aser Jaintia Hills nungi RSS züngsem 300 temai iba sentong nung shilem

Path Sanchalan ta ajaba RSS rally ya Hindi Balika Vidyalaya nungi Police Bazar adena Gurkha Pathshala Ground tashi agia liasü.

2025 nung RSS tenteter küm 100 ajungba benjungmong atema renemshia iba sentong

agi. Shillong nung tanep 8:30 ako nung sentong tenzüik aser 11:00 ako nung tembang.

Meghalaya East Khasi Hills district nung deputy commissioner-i RSS dang tangar jashitsüsa yimiyim mayimtsü indang tetuyuba agüja liasü.

Arunachal nung NSCN-KYA overground workers 2 apu

Itanagar, April 23, 2023

(Agencies): Arunachal Pradesh kübok Longding district nung Assam Rifles aser Arunachal Pradesh police külem telok kati NSCN-KYA indang overground workers (OGW) ana apu.

Rusa yimtsüng nung tena ket nung ammunition rounds 17 ngutetogo, ta sangdong ka nung ashi. Osang tejangja ka angazükba sülen AR-i Arunachal Police den külemi mita aodang NSCN-KYA indang OGWs ana apu.

April 16 nü Tirap District kübok Khanu yimtsüng nunga NSCN K (YA) indang Overground workers (OGWs) ana apu.

Tena ket nung mobile handsets 2, noklangnok ka aser taitüsü aketba kulikakettem ngutetogo.

April 16 nü Tirap District kübok Khanu yimtsüng nunga NSCN K (YA) indang Overground workers (OGWs) ana apu.

Tena ket nung mobile handsets 2, noklangnok ka aser taitüsü aketba kulikakettem ngutetogo.

BJP-i Pulwama & Balakot amshia 2019 LS nung takok angu

Agartala, April 23, 2023

(Agencies): BJP-i 2019 Pulwama amakba aser iba sülen Pakistan nung Balakot amakba tatalokbatem nung ajemdaker Lok Sabha election nung takok angutsü merang ta taoba Tripura chief minister Manik Sarkar-i ashi.

Kiralongartemi Pulwama amakbaji inyakyim meshitakba ajanga liasü ta taoba Jammu and Kashmir Governor Satya Pal Malik-i ashiba sülen anogo ishika lir Sarkar-i Deobarnü iba osang metetdaktsü.

February 14, 2019 nü Jammu and Kashmir nung suicide bomber kati Pulwama amakdang CRPF sepai 40 taküm sama.

"Iba tensa amshia BJP-i 2019 Lok Sabha election nung takok angu. Iba mapang J&K Governor inyaka alisang Satya Pal Malik-i tanü iba indang

jembir" ta Sarkar-i ashi.

Balakot tatalokba sülen iba nung tasa tajung ka dena lir kechiyong iba küm April-May nung general election mapang mapa manguba khurettem amadaktsütsü atema iba ya inyak ta CPI(M)-i shia liasü.

Pulwama amakba tayang küpzüka India nunger tayimtsütemi February 26, 2019 nü Pakistan nung Jaish-e-Mohammed tesepe ka makdoka liasü.

Malik-i iba osang metetdaktsüba sülen Prime Minister, Home Minister aser National Security Advisor nunger ola madokba atema süngmanger ta Sarkar-isa ashi. Taoba army chief Gen (retd) Shankar Roychowdhury-ia iba ken o atema tebilembatem lemsatepogo, ta paisa ashi.

"Taoba Governor-i iba osang sangoktsüba sülen pa CBI-i

jaoktsü ta ni bilema aliba mapang ka nung atangji insurance ken o ka atema CBI-i pa jaokogo" ta Sarkar-i metetdaktsü.

Jammu and Kashmir nung insurance scam ka dak sendakba nung onük kar asüngdangtsü atema Central Bureau of Investigation (CBI)-i Malik jaokogo.

Malik-i "The Wire" den sensaksem dang BJP-i aniba Centre sorkar anema jembiba sülen hopta ka majungdang CBI-i pa jaokogo.

Nübertem longjemra BJP madak takok angutsü ta CPI(M) politburo member Sarkar-isa ashi.

"Tripura Assembly elections nung nübor 60% shi kati BJP pusema menungit. Tipra Motha-i yimjak nung BJP lutsü saka parnoki BJP nem takok ngudaktsü" ta Sarkar-isa shisem.

Manipur nung tetsür ka dena PLA züngsem 2 apu



Imphal, April 23, 2023

(Agencies): Manipur police-i Revolutionary People's Front (RPF) indang armed wing People's Liberation Army (PLA) züngsem ana apu.

Tena ket nung injangtem, mobile handsets 2, Aactiva bike ka aser taitüsü aketba kulikaket kar ngutetogo ta police kettangtsürtemi ashi. Osang tejangja ka

angazükba sülen Imphal East district police unit nungi Commandos telok kati Thiyam Leikai tesepe nung RPF/PLA züngsem Johnson Ashem (John) apu.

Manipur Film Development Complex anasa Palace Compound nung pai tashiyim agi sen saruba mapa inyakdang apu.

Pa dang asüngdangya asüba sülen police-i telungpur atsüka aliba tesepe ka mita aodang tetsür züngsem ka apu. La ya Chingakhm Kshetrimayum (Sunibala Devi) ta jangjaogo.

Tenati RPF/PLA nung Brigadier Chinglen (Tomba) lenisüba kübok tashiyim agi sen saruba mapa inyakba nangzük.

Skorea tir-i Taiwan atema jembiba nung China mepelar

Beijing, Rongchii/April 23 (Agencies): South Korea tiri Taiwan indang meshidak jembiba mechi Chinese Vice Foreign Minister Sun Weidong-i South Korea indang ambassador to Beijing dang ashishitep ken o ka benokogo, ta China indang foreign ministry ajanga ashi.

South Korea Tir Yoon Suk-yeol-i jembiba ya khenyongi magizükteter, ta Sun-i ambassador dang ashi aser kanga mepelaba metetdaksü, ta Chinese Ministry of Foreign Affairs ajanga Deobarnü sangdong ka nung ashi.

Tawa Reuters news agency den sensaksemba mapang, tashiyim amshia tang aliba tensa melenshitsü meranga Taiwan temeket nung tebilemtsü tali kadaksür aser aji magizüker, ta Yoon-i ashiba sülen Beijing aser Seoul tsüngta mangatetep tuluba akum.

South Korean lenirisa China aser Taiwan tsüngta mangatetep ya tangbo alima tebilemtsü lir, ta shia liasü.

"Taiwan ken o ya China aser Taiwan tsüngta kisüng masü, saka North Korea indang ken o ama alima ajunga indang lir," ta pai Reuters dang shia liasü.

Taiwan aser North Korea tsüngta ken o metemdingba China-i khenyongi magizüker, ta ketdangsür temi ashi.

"South Korea leniri One

China principle indangbo mejembi saka Taiwan ken o Korean Peninsula ken o den metemding," ta Sun-i ashi.

"North aser South Korea ya linük balala lir aser parnok United Nations nung dena lir. Korean Peninsula ken o aser Taiwan ken o khenyongi balala ta kanga junga meteta lir aser metemdingtsü makok," ta sangdong ajanga ashi.

One China policy kübok China-i democracy yimya nung yimsü asüba Taiwan ya par litsü ka ama jembir, koba Taipei-i khenyongi magizüker. Beijing-i par linük den sendaktepa aliba linüktem dang Taiwan ya China nung meyong ama agizükdaksüner. Mainland den Taiwan tanaben lungjemdaksütsü asoshi tashiyim mamshitsü ta meshitettsü, ta China-i shia lir.

South Korea-i tarutsü jenjang kanga junga asadanga Taiwan dak sendakba ken o jembitsüla, ta Chinese foreign ministry ajanga taoba hopta aitsür sülen tang Sun-i iba ken o benoka liasü. Beijing-i jembiba anema tejashi nung Seoul-i China indang ambassador jaoka liasü aser ibai linük ana tsüngta tesendaktep atema kanga majung ta shia liasü.

Yoon-i United States semdangtsü lia China-i tejashi ya lemsatapa liasü. South Korea asoshi US ya tembar

tajungtiba lir. Taiwan nem nok-nü agütsüba atema Beijing-i akhi mapang nungi US aija arur aser pei sasa yimsü asüba asetkong nung nüjiso aginüba yimten yimsüsürtem Washington-i tali ajungmesor ta tai tongkloksür.

Yoon-i Taiwan indang jembiba ama US Department of State-ia Hokulbarnü jembiba liasü, ta South Korea indang Yonhap News Agency ajanga ashi.

"Taiwan Strait nung yimjung alitsü asoshi United States-i maneni South Korea densema tembar linüktem den inyaktüsü," ta Department indang odongtar Vedant Patel-i ashi.

Hokulbarnü Shanghai nung mungdang ka nung jembidang Chinese Foreign Minister Qin Gang-ia South Korea tiri jembiba athishir mesük jembiba liasü.

"Taiwan Strait nung tensa raksatsür aser yimjung nung tetsükdaksü agütsür ta tawa China aija arur. Iba ya kanga tai aser tatembangji lendong tulu asütsü," ta Qin-i shia liasü.

Küm ishika Taiwan Strait nung tensa tamajungba kuma arur aser tesüsa atalokbaji Taiwan Tir Tsai Ing-wen-i US semdanga California nung House of Representatives speaker Kevin McCarthy ajuruba sülen China-i tan ita military exercises tenzükba densema lir.

Myanmar election ketdangsür ka khaset

Yangon, Rongchii/April 23 (Agencies): Yimsüsür anema rarar temi Honibarnü Yangon nung Myanmar election commission indang deputy head khaset, ta mitkar temi ashir, anungji linük indang mitkartem den sendaktepa aliba lenirtem tepsetba rongnung ibaji tesüsaba alitsü.

Küm ana tejakdang mitkar temi tashiyim amshia sorkar atsüngdoka yimten tashi rakzükba sülen mitkar temi par anemer pua merenshia nüburttem animesüngzüki akum aser rongsenketzüng jenjang mejungi kumdaksü.

Pei sasa sangdongba civilian "People's Defence Forces temi mitkar anema nokdaker aser par sepaitemi mitkar den külemi inyaker ama angateter ketdangsür dak tenük yoka arur.

Union Election Commission indang deputy director Sai Kyaw Thu ya Yangon anüdoklen Thingangyun jila

nung khaset, ta mitkar sangdong ka ajanga ashi.

Ibai "People's Defence Forces" mapa lir ta parnoki ashi saka iba dak alaka tali tejangjaba mashi.

2020 küm election nung ashikülak mapa inyak ta tai tonglokja mitkar temi February 2021 nung election ajanga shimba Aung San Suu Kyi'er sorkar atsüngdoka liasü.

Mitkar temi anentsür aliba election commission dang election tasen agitsü mapang nungloksür liasü, saka mitkar anemer temi memolunger.

Mitkar temi yangluba electoral ozüng tesashi kübok tanaben register mesütetba mechi taoba ita election commission ajanga Suu Kyi'er National League for Democracy party anenja liasü.

Myanmar mitkari yariba tongti party ana, Union Solidarity aser Development Party bo register süogo, ta

Hokulbarnü sangdong ka ajanga shia liasü.

Iba telok ya 1990, 2015 aser 2020 elections nung Suu Kyi'er NLD ajanga tsükdakja liasü.

Mitkar temi yimten tashi rakzükba sülen Myanmar nung mepetmesü adoka ethnic kin nungi sorkar anemer den raraba tasen kumshi aser ano telok ter dak tema adoka tang mitkar den teraradak lir.

Linük tesem balala nung anogoshi amai mitkar lenir jenjang tajemba nung alirtem mesüra osang agütsürtem tepsetba ataloker.

Taoba küm April ita mitkar temi shimba Myanmar indang central bank deputy governor mejangjaba nisungtemi Yangon nung lar kidang khaseta liasü.

November 2021 nunga mitkar aser Vietnamese firm Viettel tsüngta telecom agütsür Mytel indang ketdangsür ka Yangon nung par ki kima khaseta liasü.

Anogo 25 süngjema aliba sülen Russia-i Kyiv amak

Kyiv, Rongchii/April 23 (Agencies): Ita ka jungnüa lir Russia-i yasüng drones amshia Ukraine yimtiba, Kyiv nung amak aser asü-amaba mali, ta iba yimti ketdangsür temi ashi.

"Anogo 25 süngjema aliba sülen tsükchir temi tayimtsü amshia Ukraine yimtiba nung ano amak," ta Kyiv indang military administration ajanga Telegram messenger nung ashi.

Russia-i Ukraine den arütsüa aliba Bryansk region nungi drones amshia Iranian Shahed 12 khaloktsü aser item rongnung ti raksatsü, ta Ukraine indang air force-i ashi.

Brehostibar nikongdang linük yimtiba nung air raid sirens mapang tatsüka ola adoka liasü.

Ajidang masü ano danga region ana nunga drones amshia amakba osang lir.

Central western Vinnytsia nung drones temi tongtipang ki o jen nung kongshia mi adok saka asü-amaba mali, ta governor Sergiy Borzov-i Telegram nung ashi.

Central Poltava region nung drone kati Hokulbarnep civilian indang ki o jen nung kongshia yangjia mi adok saka asü-amaba osang mali, ta iba region indang military administration tekolakba Dmytro Lunin-i ashi.

Mulungnen O



ASOBA:
26/07/1941

ASÜBA:
18/04/2023

Ozüi meimla ojala/ otsüla Watsü **Tiakala Jamir** (Süngratsü) iba lima nungi pila aoba asoshi mulungzürepa iba mulungnen O zülur. La ya temeim aketba, aria bilemba aser tejungnü nisung ka liasü, shibai la den ajururtem ajak taküm nung tangshi.

Ozü asüku mapang shirnokisa mangyim tako marok lemsatapa yaritepogo nenok ajak dang temulungi mesemi pelar. Nenok aria bilemtsüba O tajungtem aser sarasadem ajanga ozü mulung süneptsü aser tashi itdaksü. Kotaker Tsüngremi nenok nem lepa moajang ta ozü tamang sarasadem.

Kangasa pelar,

**Mapumongba Aier,
Chirnur, anükapang aser semchisemnurtem**

Sudan nungi US embassy staff tem aninba Biden-i jangjatsüogo

Washington, Rongchii/April 23 (Agencies): United States embassy staff aser parnok kinungertem US sepaitemi Sudan yimtiba Khartoum nungi aninogo, ta tir Joe Biden-i ashi.

Sudanese army aser paramilitary Rapid Support Forces (RSF) na rara tenzükter hopta anati ayaoka aiba mapang iba rara nung nisung noklang aika tepsetogo aser nisung meyrejang aika yiruogo.

"Ni tetuyuba agüja United States military-i Khartoum nungi US sorkar ketdangsürtem aninogo," ta Biden-i ashi.

Deobar anepdang RSF-i sangdong ka ajanga, parnoki US military mission ka den tongtepratepogo aser tayimtsü trok nung US diplomat tem aser parnok kinungertem linük nungi aninogo, ta ashi.

"Rapid Support Forces Command-i, Deobarn anepdang diplomat aser parnok kinungertem anintsü atema tayimtsü trok densema aliba US Forces Mission ka den tongtepratepogo," ta RSF-i tweet asü.

RSF-isa, diplomatic mission ajak den teka amteper inyaktüsü aser takokba tashi tekümzükba agütsütsü aser parnok pei linüki kecha tetsükdaksü makai yoktsü atema tenanzükba agütsüogo.

Biden-i sangdong ka ajanga iba mapa nung shilem agiba US sepaitemi tasa tajung amshiba atema tenüngsang agütsüogo aser Djibouti, Ethiopia aser Saudi Arabia-ia iba inyakyim nung teyari agütsüogo, ta metetdaksü.

US embassy staff tem ya Ethiopia nungi tesem kati anir ao, ta ken o jangja aliba US ketdangsür anati Associated Press news agency dang ashi. Sudan nungi aninertem rongnung US nung 70 shi

densema alitsü ta amanger.

Embassy staff temi linük toktsüba sülen Washington-i Khartoum nung mapang telatetka makai US mission shibangtsüogo aser White House-i ashiba agi, Sudan indang embassy nung US lisopur 16,000 shi züngoksema aliba anintsü asoshi kecha sentong mali.

US Secretary of State Antony Blinken-i Twitter ajanga ashiba agi, US-i Sudan nung nungertem tekümzükba kübok toktsütsü atema teyari agütsütsü. Paisa, Sudan tali tamajungba raksa meyoxtsü atema rara anentsü ayongzüka liasü.

Kasa mapang nung linük balala nungi nisung 150 shi Honibarnü Saudi Arabia tongaogo, koba Sudan nungi civilian tem aninba mezüngbuba asütsü.

Saudi Arabia indang foreign ministry-i, Honibarnü lisopur 91 den Kuwait, Qatar, United Arab Emirates, Egypt, Tunisia, Pakistan, India, Bulgaria, Bangladesh, Philippines, Canada aser Burkina Faso nungertem linük tonga aruba osang sangdongogo.

Saudi naval forces-i Port Sudan nungi temerem tzüym adena Jeddah tonga lisopurtem ya anir aru, kong diplomats aser international ketdangsürtem densema liasü.

Linük balalai ashiba agi, Sudan nungi lisopur meyrejang aika anintsü atema sentong yangludar, ajisüaka Sudan indang airport tongtiba shibanga lir.

Abdel Fattah al-Burhan lenisüba nung Army aser Mohamed Hamdan Dagalo lenisüba nung RSF nati ceasefires benokba sülen tashi anga manidaki arudar aser anogoshia raratepa arudar.

Kihevi Zhimo-i 3buba Snooker Ranking asayamung kokogo



Kohima, Rongchii/April 24 (TYO): Boulevard Snooker Club Dimapur nungi Kihevi Zhimo-i 3buba Snooker Ranking Tournament kokogo. Iba asayamung ya Cue Association of Nagaland (CAN)-i ayongzuka Baulkline Club Kohima nung asaya liasü.

Final asaya nung Zhimo-i, külem Boulevard nungi asayar Togukha Chishi straight two frames nung koka liasü.

Iba asayamung akokba sülen Zhimo nem senpet sen 20,000 den takok marok agütsüogo aser runners-up Chishi nem senpet sen 10,000 agütsüogo. Pai, highest break point award sen 6000 ngua liasü.

Semifinal tongteta asayaba asayar Area 51 Kohima nungi Temjenlemba Longchar aser Area 147 Kohima nungi asayar

Rukusato Khesoh na nema senpet sen 5000 (asayar shia) agüja liasü.

Iba asayamung ya Baulkline Club-i host süa April 21 aser 22 nü asaya aser Dimapur aser Kohima kübok club pongu nungi asayar 32-i shilem agia liasü.

Asayamung shibangba sentong nung alakteta jaoker ama shilem agiba mapang Advisor to Chief Minister and Chairman of Nagaland Khadi & Village Industries Board, Dr Neiphrezo Keditsu-i snooker asaya ya state nunga tanem tanemi nüngtugu küma odar ta ashi.

Snooker ya Olympic Games nung shilem ka masü ta sasasetta jembiba mapang pai, alima ajunga nung snooker association temi meranga inyakdar anungji Olympics

Association-i iba asaya yakta agizüksü imlaba lemsatep.

Snooker asayatem nem asayatsü asoshi maongka agütsüba atema CAN nem tenüngsang agütsüba den pai, Nagaland nungi asayartema world ranking standards tonga asayatetsü imlaba lemsatep. Paisa, ano club tem aikati CAN nung adentsü imlaba lemsatapa liasü.

Maneni Keditsu-i, asayatem dang asaya aika nung shilem magi-i asaya ka dak dang rangloker bendanga agüja asayatsü ayongzuka liasü.

CAN mezüngbuba tir Yanger lenisüba nung iba sentong agi aser kasa mapang nung CAN tir Atuyeto Zhimomi-i okila jembiba aser Baulkline Club tir Krelo-i tepela o jembiba liasü.

Bajrang, Sakshi & Phogat nungeri anir wrestlet temi maneni longka aiter



Rongchii/April 23, 2023 (Agencies): Wrestling Federation of India (WFI) tir Brij Bhushan Sharan Singh anema Jantar Mantar nung maneni longkak aitba mapang Bajrang Punia, Sakshi Malik, Vinesh Phogat nungeri parnok bilemba lemsatepogo.

Wrestler temi Deobarnü nungi tenzüka Brij Bhushan anema longka ait tenzüko aser ashiba agi, WFI tekolakba anema jenjang kecha magiba sülen parnoki iba longkak aiba sentong ayongzükshi.

Tetsür wrestler teneti sexual harassment dak sendakba nung Brij Bhushan anema ken o benokogo. Ajisüaka tang tashi nung FIR ka danga officially benoka mali.

Longkak aita aliba wrestler temi taoba mapang ashiba agi, minor ka densema tetsür

wrestler teneti Parliament Street Thana nung tashishiba ka agütsü, ajisüaka police-i FIR file asütsü memulungi liasü.

"Anogo ana tejakdang onoki CP Police Station nung ken o ka benokogo, ajisüaka FIR tang tashi register masü. Minor ka densema tetsür teneti Brij Bhushan Sharan Singh anema sexual harassment ken o ka benokogo. Onok dang Hombarnü jembitsü ashi ajisüaka anogo ana süiogo," ta Sakshi Malik-i Deobarnü osangbenertem den sensaksemba mapang ashi.

"Onok ita anaser tesadang ataogo. Sorkari onok pusemstü ta amanga liasü. Ajisüaka report indang osang kecha mali. Nüburtemi onoki teyazü jembiba ta bilem tenzüko, onoki iba ya magizükteter kechiyong onok ochi nung nokdaka lir aser onok

iba rara akoktsü," ta lai shisem.

Kasa mapang nung Bajrang Punia-i, "federation-i national asayamungtem ayonger, office aki ama inyaksangshi tenzüko süra asayartemi mepeshiba anga manga? Onoki FIR benoktsü atema tashishiba ka agütsüogo. Shibai teyazü jembir aji yakta jangjatsü. Onoki kechiba FIR mebenoker ta ashir, ajisüaka tetsür teneti tashishiba benokba sülena kecha jenjang magir," ta ashi.

FIR benokra wrestler temi longkak aiba anentsü asü ta asüngdangba mapang Bajrang-i, "nisung ka danga mapu tashi onoki longkak aittsü," ta langzü.

Vinesh Phogat-ia aija alir anema jenjang tapet agitsü khangogo aser ashiba agi, wrestler tem ita asem tashi tekolok shisatsü kanga mesüngjemeti aruogo.

Novak Djokovic Madrid Masters nung masayatsü

Madrid, Rongchii/April 23 (Agencies): World number one asaya Novak Djokovic Madrid Masters nung shilem magitsü, ta asayamung ayongertemi metetdaksüogo.

"Novak Djokovic Madrid Open nung shilem magitetsü," ta asayamung ayongertemi April 26 nü asayamung metenzük tsüngda Instagram nung zülutsü.

Djokovic-i iba asayamung nung shilem magitsü atema telemtetba agiba ya pa tekatsüla nung timtem aliba ajanga asütsü ta bilemer aser iba ya French Open atema pa renemshia aliba nung tetsükdaksü tuluka asütsü, koba May tatemlen tenzüksü.

Arishi küm 35 tain Serbia nunger asayar ya Hokolbarnü Bosnia-Herzegovina nung Banja Luka asayamung quarter finals nung Dusan Lajovic-i straight set nung koka liasü.

Kasa mapang nung pa April ita tetenzüklen Monte Carlo Masters nunga pa Lorenzo Musetti-i tsükdaksü aser Srpska Open metenzük tsüngda

pa tekatsüla nung timtem aliba indang metetdaksa liasü.

Djokovic aser Rafael Nadal naprongla Madrid nung shilem magitsü, koba Roland Garros atema renemshiba nung tongtibang shilem ka lir. Djokovic aser Rafael Nadal napronglai tang tashi nung Grand Slam metsür anana koka lir.

Kasa mapang nung Djokovic Covid-19 vaccine magiba ajanga taküm Indian Wells aser Miami nung shilem magitetsü liasü.

"Ni asayanüba dang nungi kanga dang tekübokba jenjang nung asayaogo," ta Djokovic-i world number 70 Lajovic-i tsükdaksüba sülen ashi.

"Yamatu dang asayara ni iba surface nung kanga junga asayaba asayatem makoktsü. Ajisüaka ni kechi inyaktetsü, iba ya asaya lir. Ni takok tashi asayadangogo, ajisüaka takok mongutet.

"Ni temang jangrademra masü. Ni meyilongi asaya aser ball aika junga mezüksü. Ni mapang kar nungbo junga asayaogo, saka asayaba jenjang kanga majung liasü," ta pai ashi.

Archery WC: India tebur Recurve Team-i silver angu



Rongchii/April 23, 2023 (Agencies): Tang asaya aliba Archery World Cup Stage 1 nung Deobarnü recurve team asaya final nung China makokba sülen India team-i silver medal dang nguteta liasü.

Tebur recurve team nung asayar Tarundeep Rai, Atanu Das aser Dhiraj Bommadevara nungeri 0-4 agi tesülen aliba nungi meyipa arur China team menepa shoot-off asütsüsa aküm. 2010 küm sülen India recurve team-i tang tashi nung World Cup nung gold medal ka danga ngua mali.

Final asaya ya India team-i 4-5 (54-55, 50-56, 59-58, 56-55, 28-28*) agi makok. Shoot-off nung China team nungi asayar Li Zhongyuan, Qi Xiangshuo aser Wei Shahoxu nungeri X (teyongtsü anasa) nung kashia parnoki asaya akok.

World Cup Stage 1 nung India team-i tang tashi nung gold ana aser silver medal ka ta ngua lir aser Dhiraj recurve individual category nunga asayatsü.

Final asaya tanabuba set nung India team-i point 60 angutsü aliba nungi 50 dang nguteta liasü aser China-i point trok agi koka 4-0 agi parnok tejakdang aküm.

India team-i asaya meyilongi dang tenzüker aser mezüngbuba set ya China-i point ka agi akok.

Set tasembuba nungang team-i kanga junga asaya tenzüker aser X nung asembe tashi khashiba densema parnoki 10s nung ponguben khashi.

India team-i iba asayamung nung mapang talangka gold medal monguteti arudar.

2014 küm Stage 2 Medellin aser Stage 4 Wroclaw nung takok angutsü maongka liasü saka takok mongutet.

Antalya nung 2008 küm Indian men's recurve team-i World Cup nung mezüngbuba medal ngua liasü.

India-i men's recurve team event nung tatemsa 2010 küm Shanghai nung asayaba mapang World Cup gold medal ngua liasü.

BILEMDANGANG

"Nü tajungtiba agi inyakang. Nai tang inyakbaji, tarutsü nung bendentsü."